

Utoqqaat suli sulisinnaasut sulinerisigut utoqqalinersianit ilanngaanneqartarnerat naapertuunnersoq pillugu apeqquteqaat aallaavigalugu oqallinnissamik siunnersuut.
(Inatsisartunut Ilaasortat Siverth K. Heilmann aamma Knud Kristiansen, Atassut)

Akissuteqaat

(Ilaqutariinnermut, Kultureqarnermut, Ilageeqarnermut Nalagiissitaanermullu Naalakkersuisoq)

Utoqqaat aamma sulinerimikkut aningaasarsiaqaraangata utoqqalinersiutaasa oqaluuserineqarnissaannut siunnersuummut matumunnga qujavunga.

Inatsisartut peqqussutaat nr. 3, 7. maj 2007-meersoq naapertorlugu utoqqalinersiutit tunniunneqartarput.

Nunatsinni utoqqalinersiutit akileraarutitigut 100%-imik aningaasalersugaapput, Namminersorlutik Oqartussat aningaasartuutit 90%-iinut kommunillu 10%-iinut aningaasaliissuteqartarlutik. Utoqqalinersiutit isumagininnikkut soraarnerussutisiaapput, utoqqarnut aningaasaqarniarnikkut ajornartorsiornerusunut sammititaallutik. Taamaasilluni innuttaasunut utoqqaanerusunut aningaasaqarnikkut atugassarititaasut qulakkeerneqarnissaat utoqqalinersiutit siunertarivaat.

Utoqqalinersiutit tunniunneqarnissaannut, qanorlu annertutigisut tunniunneqarnissaannut inoqutigiit isertitaat tamarmiusut akileraarusigassaasut qanoq annertutiginerat aalajangiisuusarput.

2012-imi utoqqalinersiutilinnut kisermaanut, aappariinnullu aappa kisimi utoqqaalinersiutisiaqarsinnaatitaappat, utoqqalinersiutit aningaasartaat ukiumut kr. 123.497-inut aalajangersagaapput. Inoqutigiit aningaasarsiaasa 56.000 kr. sinnerpagit, utoqqalinersiutit ilanngaaffigineqartarput. Saniatigooralugu isertitat 228.000 kr. sinnerpagit, utoqqalinersiutit atorunnaassapput.

Aappariinnut marluullutik utoqqalinersiutisiaqarsinnaatitaasunut utoqqalinersiutit kr. 168.405-inik annertussuseqarput.

Aappariit utoqqalinersiutillit utoqqalinersiutisiaminnik ilanngaaffigineqaratik 84.000 kr. tikillugit aningaasarsiaqarsinnaapput, aningaasarsiallu aatsaat 318.000 kr. sinnerpatigit utoqqalinersiutit peerneqartarlutik.

Utoqqalinersiuteqartitsineq qanoq aaqqissuunneqassanersoq akuttunngitsumik oqaluuserisarpaarput, taamaasilluni utoqqalinersiutillit tamarmik pilersorneqarnissamut naleqquttumik tunngavissaqarnissaat qulakkeersinnaassallutigu, peqatigisaanillu utoqqaat sulisinnaasut sapinngisamik sivisunerpaamik sulisinnaasillutigit. Oqallittarnerit tamakku pingaaruteqarput, innuttaaqatittami utoqqaanerusut suliffimminnik attassiuannaralarunik pitsaasunik atugassaqartitaanissaat tamatta annertuumik soqutigisarigipput takutikkamikku.

UKA 2012-imi kingusinnerusukkut "Nunatsinni siunissami utoqqaat – utoqqaat pillugit 2012 – 2015-imut Naalakkersuisut periusissiaat" oqaluuserisussaavarput, tassani ilaatigut utoqqalinersiutit pilersorneqarnerlu oqaluuserisussaallutigit, aammalu soraarinnngornissamut aningaasanik ileqqaaruteqarnermut aaqqissuussinerit siuarsarneqarnissaat oqaluuserissallutigu.

Utoqqartatsinnik taakkualu misilittagaannik sulisoqarnermut tunngasuni atorfissaqartitsinitsinnik siunnersuuteqartut oqarnerat Naalakkersuisut isumaqatigaat. Peqatigisaanillu utoqqalinersiutit pillugit inatsisivut ima aaqqissuussaapput, utoqqalinersiutit isertitat naapertorlugit annertussusilerneqartarlutik, tassalu allatigut isertitarisinnaasat annertusiartortillugit utoqqalinersiutit tunniunneqartut ikinnerujartortarlutik. Utoqqalinersiutinut aaqqissuussinerput tassaavoq isumaginninnikkut aaqqissuussineq, tassuunakkut innuttaasut tamarmik 65-inik ukioqalereersut allatigut isertitassaqaarnissamut periarfissaqaangitsut, imaluunniit isertitaqaarnissamut annikitsuinnarmik periarfissaqartut pilersorneqaarnissaat qulakkeerneqartarluni.

Danmarkimi aaqqissuussineq allatut ittoq atorneqarpoq, tamanut utoqqalinersiuteqartitsineq atorneqarmat. Kikkut tamarmik utoqqalinersiuteqaarnissamut ukiussaritaasunik ukioqalereersimasut, utoqqalinersiutinut tunngaviusumik aningaasartaliunneqartunik utoqqalinersiuteqaarnissaat qulakkeerneqartarpoq. Tamatuma saniatigut utoqqalinersiutillit utoqqalinersiutimik saniatigut annikitsuinnarmik isertitaqaarunik isertitaqaangikkunilluunniit, pisariaqarpat assigiinngitsunik tapiiffigineqarsinnaapput. Inunnut isertitaqaarluareersunut, taamaasillunilu – aamma utoqqalereernerminni – imminnut tamakkiisumik pilersorsinnaasunut utoqqalinersiuteqartitsisarnerup naapertuuttutut isigineqarsinnaanera Danmarkimi akuttunngitsumik oqaluserineqartarpoq.

Ukiuni aggersuni Nunatsinni utoqqaat amerlanerungaatsialersussaavugut. Tamanna utoqqalinersiutinut aningaasartuutit amerlinerisigut Landskarsimut tamaviaartitsissaaq. Aaqqissuussineq ullumikkut atuuttoq assignagu utoqqaat inuussutissarsiornikkut isertitaqartut utoqqalinersiutaannit ilanngaaffiginagit aaqqissuussinissaq periarfissanngortikkaluarutsigu, imaluunniit kikkut tamarmik utoqqalinersiuteqaarnissaannik aaqqissuussineq periarfissanngortikkaluarutsigu, tamanna Landskarsip aningaasartuuteqarnerulerneratigut aningaasatigut annertuumik kinguneqassaaq, utoqqaalli inuussutissarsiornikkut isertitaqartut akileraarutinut akiliinerusarnerisigut kinguneri ilaatigut akilerneqarsinnaassapput.

Saniatigooralugu isertitanut killiliussat allanngortinneqarnerisa utoqqalinersiutillit sulinermut atatillugu pissusilersoriaasiannut qanoq sunniuteqarumaarnissaa siulittoruminaappoq. Taamaattumik utoqqalinersiutinit ilanngaaffigitinnani saniatigooralugu isertitanut killiliussap annertusinissaa periarfissanngussagaluarpat, utoqqalinersiutillit qanoq amerlatigisut sulerusuttuaannassanersut, qanorlu annertutigisumik sulerusussanersut erseqqissumik nalilersussallugu periarfissaqaangilaq.

Utoqqaalli ilaat qaffasinnerusumik ilinniagaqarsimasut sivisunerusumik sulisinnaanissaat naatsorsuutigineqartariaqarpoq, utoqqaalli allat ilinniagakinnerusut taamaassimappallu timikkut tamaviaarnartumik suliaqarsimasut siusinnerusukkut soraarninngortarnissaat naatsorsuutigineqartariaqarluni.

Utoqqalinersiuteqartut utoqqalinersiutiminnik ilanngartuiffigineqanngikkaluarlutik sulinissaminnut annertusisamik periarfissaqarsinnaanerisa eqqarsaatigineqaarnissaat Naalakkersuisut 2025-mut pilersaarummi saqqummiutereerpaat. Tamanna pisinnaavoq sulisorineqarsinnaasut ikiliartornerat ilutigalugu, pisortat aningaasiviinut attanneqarsinnaasumik aaqqissuussiffigineqarsinnaassappat. Soraarnerussutisianut tunngasut aaqqissuuteqqinnissaanni aggersuni Naalakkersuisut apeqqut taanna ilaatitassavaat..

Soraarninngornissamut aningaasanik ileqqaarnerup siuarsarneqartariaqarneranik siunnersuuteqartut oqarnerat Naalakkersuisut isumaqatigaat, taamaasilluni innuttaasut amerlanerpaat utoqqalinerminni pilersorneqaarnissaminnut tapertaasinnaaqqullugit.

Taamatut oqaaseqarlunga oqallilluarnissaaq Naalakkersuisut qilanaarivaat.